

萬有文庫

第二集七百種

王雲五主編

張文忠公全集

(七)

張居正撰

商務印書館發行

張文忠公全集

(七)

張居正撰

國學基本叢書

明張文忠公全集

文集九

辛未進士題名記

隆慶辛未。禮部大比貢士。中式者四百人於廷。皇帝臨軒親策。問以隆禮敦讓。化民成俗之道。賜張元忭等及第出身有差。已所司循故事。請立石太學題名。有詔令臣爲之記。初臣典試南宮。諸士實繇臣以進。故上使臣記其事。臣既閱其甲第姓名。乃竊歎曰。夫諸士之託名於貞石也。將以靳不朽也。聞古之所稱不朽者三。而言居其一。然自書契以來。士之殫精神於毫素。期以爲後世名者衆矣。今世所稱名家。大方可指數者無幾耳。乃默識躬蹈之士。倜儻非常之人。雖不靳以言傳。而隻辭片語。往往見稱於人。或勒諸金石。守爲蓍蔡。無敢忽焉何哉。天下之物。必有其實。而後乃發之於華。芳林墮蘂。採擷遺英。色非不鮮。彩非不炫也。乃不終朝而萎蘼者。無本故也。故德與功本也。言華也。道德有諸中。於是以宣其蘊蓄。則爲有德之言。而德非言之所能盡也。功績底於成。於是以述其梗概。則爲後從之言。而功非言之所能盡也。惟不得已而發之於言。而言又不足盡其蘊。斯其爲言也。聽之而有味。愛之而必傳。蓋古之所爲者以此。向也臣固聞諸士之言矣。今既因其言以策名於朝。又勒名於石。則諸士之所靳於後世者。亦徒以其言而已乎。其猶未也。夫德與功與言者。析之則三。撮之則一。德與功待言。而言不出於德功者。未能傳也。今諸士抑首受書。幸一旦離蔬釋屨。而登天子之廷。其德與功且未見其端倪也。而獨以其言靳名於後世。庸

詎能乎。君子進德修業。忠信所以進德也。修詞立其誠。所以居業也。夫修詞在立誠。以存忠信。則其爲言也。孰尙焉。諸士其亦務所以進德居業者。以自樹其本。而後修詞以立其誠。由是令名載而行之。雖與天壤俱敝。可也不然。則昔之植碑沈石者。慮陵谷之有變遷。而其名不可磨也。今陵谷未改。而其言已澌盡矣。莓苔并沒。燕山之石。可勝用乎。然其德政至今猶在人口者。則非徒恃以言耳。故臣以爲不朽之圖。在此不在彼也。是科也。貢於南宮者三百□十□人。前科附廷對者□人。合四百□人。

懋修謹按。故事。會試主考者。卽記題名。辛未當先父。而是科張陽和。鄧定宇二公。屢爲請索。先父以機務未暇。遂延至五科。俱未鐫記。張鄧二公。每以爲言。適先父作記已成。而二公又以差去。不及催請。此記遂久留書記所。而先父告終。二公俱不在京師矣。其後癸未。禮科以五科無題名記。缺典爲請。上命自內閣以下。詞臣撰補之。而五科缺典始完。懋修亦不知先父親筆書記。乃在記室所也。遺笥之手澤空存。公庭之貞石未勒。梓此以存。凡以完詞林之逋。乃辛未諸公咸未之見也。

京師重建貢院記

今天子踐祚之三禩。新修貢院成。其地因故趾。拓旁近地益之。徑廣百六十丈。外爲崇墉施棘。徼道前入。左右中各樹坊。名左曰虞門。右曰周俊。中曰天下文明。坊內重門二。左右各有廳。以備譏察。次右曰龍門。踰龍門。直甬道。爲明遠樓。四隅各有樓相望。以爲瞭望。東西號舍七十區。區七十間。易舊制板屋以瓦甍。可以避風雨。防火燭。北中爲至公堂。堂七楹。其東爲監試廳。又東爲彌封受卷供給三所。其西爲讀牋錄二所。簾以外殖殖如也。翼翼如也。後爲聚奎堂七楹。旁舍各三楹。主試之所居也。又後爲燕喜堂三楹。

東西室凡十六楹。諸胥吏工匠居之。其後爲會經堂。堂東西經房相屬。凡二十有三楹。同考者居之。簾以內。渠渠耽耽如此。其他庖福庫舍。所在而有。明隩向背。咸中程度。其規制名額。雖仍舊貫。而閎麗爽垲。遂密縈隩。視舊制不啻三倍。工始於萬歷二年三月。以明年九月告竣。計庸三十六萬有奇。費以五萬金。旣告成。事於上。於是司空郭公率其屬。請予爲文以記之。按京師貢院。始於永樂乙未。是時考卜未定。文皇帝以巡狩御行幄。庶事草創。其所舉士。秋試不過數十人。春試率百餘人。故試院規制。雖頗湫隘。亦僅能容及燕鼎。旣定。人文漸開。兩畿諸省。解額歲增。士就試南宮。至四千有奇。而貢院偃隘如故。又雜居民舍間。余爲諸生。就試南宮。及官詞林。典試文武士。數遊其中。恒苦之。自嘉靖間。建議者咸請改剏西北隙地。或言東方人文所會。宜因其趾。而充拓之以從新。然旋議旋輟。未有必然之畫也。今天子始俞有司之請。一旦煥然。易敝陋而爲閎麗。士之挾策而來者。不啻若登龍門。探月窟矣。嗟乎。振敝維新。固自有時。舉二百餘年之陋制。一旦建爲堂構巨觀。非振奮烏能有成哉。嘗謂創始之事。似難而實易。振蠱之道。似易而實難。室已圯而鼎新之。易也。鳩材庀工而已。惟夫將圯而未圯。其外隆然。丹青赭堊。未易其舊。而中則蠹矣。匠石顧而欲振之。聞者必以爲多事。而弗之信。其勢不至於大壞極敝不已也。明興二百餘年。至嘉隆之季。天下之勢。有類於此者多矣。紀綱法度。且將陵夷而莫之救。有識者憂之。今天子茂齡撫運。嘉與海內更始。於是舉二百餘年之將墜而未仆者。一切振而舉之。然衆庶之見。溺於故常。令下一年。而民疑二年。而民謗。不曰上之所以興廢起墜者。皆申飭舊章也。而曰創行新政也。浮言四起。聽者滋惑。賴主上明聖。不少搖惑。蓋五年於茲。而後仆者起。暗者睹。於是海內始知相與歌誦上德。翊戴明主。而不知始之振

之。如是其難也。夫論治者。怠則張而相之。廢則掃而更之。夫惟能張之而毋怠。則自不至於廢而可更。故虞廷當治定功成。禮樂明備之時。而其君臣。賡歌以相勸。惓惓以率事省成爲言。怠荒無虞爲戒。蓋恆恐其怠。而思以張之也。嗚呼。繼自今上之取士。與士之待用者。其亦遠覽虞廷率事儆戒之意。感明主振興才儁之心。皆務爲恪恭匪懈。爲國家建久安長治之策。其無驚爲儉安苟祿。以墮上之事哉。

司禮監太監馮公預作壽藏記

馮公壽藏。在京城西南可二十餘里。實黑山之壤。聚爲太監剛公墓。剛在永樂時。隨成祖靖難有功。公素慕其爲人。故卽其地旁而卜兆焉。左瞻城闕崔巍。右瞰香山碧雲。廣途前舒。層巒背擁。氣佳哉。鬱鬱蔥蔥。信靈境也。前爲大門。馳道屬之。門內左爲僧寺。以奉香火。右爲護藏之宅。寺宅後爲石樓。各一中爲祠堂。堂後爲壽藏地。繚以周垣。樹之松柏。左右又各爲塋兆。一左則公之名。下太監王君喜輩之藏。右則公弟都督君佑之藏。其制務爲朴素堅固。不事華飾。其工費則以三朝賜金爲之。董工者卽其弟都督君與王君喜也。工始于萬歷改元之九月。至二年九月而告成。事役旣竣。公勸余文記其事。用垂不朽。余惟霄壤間。萬物皆有盡。惟名爲不朽。今京西之原。珥貂貴寵。高塚連雲者何限。無論後代。卽今人所與知者幾何。昔巷伯興詠于畝邱。史游殫精于籀書。呂疆清貞。承業忠鯁。皆並耀四星。流芳千古。今求其所爲葬地。尙有存者乎。固知不朽之圖。在此而不在彼也。公昔以勤誠敏練。早受知于肅祖。常呼爲大寫字而不名。無何卽超拜司禮。筦內政。嘉靖丙寅。迎立穆宗皇帝。以功廕其弟姪數輩。穆宗不豫。召輔臣至御榻前。受顧命。公宣遺詔。音旨悲愴。今上踐祚。奉先帝遺命。以公掌司禮監事。適余得上召見於平臺。付以國政。宮

中府中事無大小悉諮於余而後行。未嘗內出一旨。外十一事。調和兩宮。贊成聖孝。侍上左右。服勤備至。凡宸居早暮。出入飲膳。皆有常度。誓御供事。皆選端慎者以充。上日御講幄。無間寒暑。公惓惓勸學。侍立終日。日無惰容。凡宮中冗費。悉從減省。務在節財愛民。如大庖減供御。惜薪司裁去柴炭。御馬監省芻豆數。皆公所奏施行。余每對便殿。從容語及國家事。有關於君德治道者。公必導上曰。先生忠臣。先帝簡託以輔上者。所言宜審聽之。宮壺之內。尤極嚴肅。有干紀者。悉置之理。雖所厚亦不少貸。故上以冲齡踐祚。中外寧謐。宮府清宴。蓋公之力爲多。語曰。人貌榮名。豈有既乎。今以公建立。視古巷伯之倫。何讓焉。誠由此永肩一心。始終弗替。雖與霄壤俱存可也。又奚竢於壽藏而後永乎。然窀穸之事。人所諱言也。而公乃預爲之達也。營以賜金。用彰君賜忠也。制用質朴。不爲厚藏。智也。愛其身。施及其弟。葬其屬。仁也。此皆卽事可紀者。因略述公之行誼。與其作藏日月。勒之於石。俾後來者觀焉。公諱保。常山之深州人。

懋修謹按。先父之與馮司禮處也。亦宮府相關。不得不然。謝世之後。言者用爲罪端。今觀其與預藏文。惓惓勉以令名。固非阿私賄結者。曾記萬歷丙子年。司禮之姪。都督馮邦寧者。以貴倨使酒。凌市人。適遇先父長班隸人姚曠者。勸之。邦寧手握姚曠。曠卽摔碎其衣。帶同赴朝房。稟先父。先父卽致一帖與司禮云。其姪之使酒失儀。宜戒飭。馮卽杖其姪四十。奏革職待罪。一年方得與朝列。按此一事。卽士大夫之賢者。猶不能無護短之意。作於言色。而馮君信先父之深。竟割愛處斷。可見先父當主少之時。於左右侍近。其調處之術。可謂深矣。不然。以先父之嚴毅。使左右不服其調處。亦將奈之何哉。苦心國事者。自當有推諒其衷者矣。余言雖嫌由父子之私衷。似乎違衆非之極。詆然已幽沈之善。安忍避私畏。

遠而掩之乎。

遊衡嶽記

山海經。衡山在中山之經。而不列爲嶽。豈禹初奠山川。望秩猶未逮與。舜典。南巡狩。至于南岳。今瀟湘蒼梧。故多舜跡。殆治定功成。乃修禋祀與。張子曰。余登衡嶽。蓋得天下之大觀焉。十月甲午。從山麓抵岳廟。三十里。石徑委蛇盤曲。夾以虬松老桂。含煙裊露。鬱鬱蔥蔥。已不類人世矣。余與應城義河李子先至。禮神畢。坐開雲堂。湘潭會沙王子。漢陽甌山張子。乃從他間道亦至。同宿。是夜恍然若有導余升寥廓之宇者。躡虹梯。憑剛飈。黃金白玉。幻出宮闕。芝草琅玕。璨然盈把。殆心有所憶。觸境生念云爾。乙未晨。從廟側右轉而上。仄徑縹緲。石磴垂接。懸崖巨壑。不敢旁瞬。十步九折。氣填胸臆。蓋攀雲捫天。若斯之難也。午乃至半山亭。亭去嶽廟十五里。五峯背擁。雲海盪漾。亦勝境也。飯僧舍。少憩。復十五里。乃至祝融初行山間。望芙蓉。煙霞石廩。天柱諸峰。皆摩霄插雲。森如列戟。爭奇競秀。莫肯相下。而祝融乃藏諸峰間。才露頂如髻。及登峰首。則諸峰顧在屐底。若揖若退。若頽若拱。瀟湘蒸江。一縷環帶。因憶李白五峰晴雪。飛花洞庭之句。蓋實景也。旁睨蒼梧九疑。俯瞰江漢。絃埏六合。舉眎皆盡。下視連巒別嶺。悉如培塿蟻垤。不足復入目中矣。同遊者五人。咸勒石紀名焉。暮宿觀音巖。巖去峰頂可一里許。夜視天垣諸宿。大者或如杯盂。不類平時所見也。晨登上封觀。海日初出。金光燦燦。若丹鼎之方開。少焉。紅輪湧於海底。火珠躍于洪鑪。旋磨旋瑩。蒼茫雲海之間。徘徊一刻許。乃掣浮埃而上。噫。吁。嘻。奇哉。偉與。山僧謂此日澄霽。實數月以來所無。往有好事者。候至旬月。竟不得見去。而余輩以杪秋。山清氣肅。乃得快覩。蓋亦有天幸云。然心悚神懼。

不能久留。遂下兜率。抵南臺。循黃庭觀。登魏夫人昇仙石。西行四十里。得方廣寺。方廣在蓮花峰下。四山重裹如瓣。而寺居其中。是多響泉聲。徹數里。大如轟雷。細如鳴絃。幽草珍卉。夾徑窈窕。錦石斑駁。照爛丹青。蓋衡山之勝。高稱祝融。奇言方廣。然礪道險絕。巖壑幽邃。人罕至焉。暮謁晦菴南軒二賢祠。宿嘉會堂。夜雨曉起。雲靄窈冥。前峰咫尺莫辨。徑道亦絕了。不知下方消息。自謂不復似世中人矣。止三日。李子拉余。衝雲而下。行數里。所倏見青雲霽日。豁然中開。問山下人。乃云。比日殊晴。乃悟向者。吾輩正坐雲間耳。又從廟側東轉十餘里。得朱陵洞。云是朱陵大帝之所居。瀑泉灑落。水簾數疊。挂于雲際。垂如貫珠。霏如削玉。飛花散雪。縈灑衣襟。巖畔有冲退石。大可徑丈。列坐其次。解纓濯足。酌酒浩歌。當此之時。意愜心融。居然有舞雩沂水之樂。誠不知簪被塵鞅之足爲累也。是日石棠李子亦自長沙至。會于嶽廟。同返自甲午迄辛丑八日。往來諸峰間。足窮于攀登。神罷于應接。然猶未盡其梗概也。聊以識大都云。張子曰。昔向平欲俟婚嫁已畢。當徧遊五嶽。嗟乎。人生幾許時。得了此塵事。唯當乘間自求適耳。余用不肖之軀。弱冠登仕。不爲不通顯。然自惟涉世酷非所宜。每值山水會心處。輒忘返焉。蓋其性然也。夫物唯自適其性。乃可永年。要欲及今齒壯力健。卽不能與汗漫期於九垓。亦當徧遊寰中諸名勝。遊目騁懷。以極平生之願。今茲發輒衡嶽。遂以告於山靈。

後記

張子旣登衡嶽數日。神恂恂焉。意罔罔焉。類有擊于中者。蓋其悟也。曰。嗟乎。夫人之心。何其易變而屢遷耶。余前來道大江。遡漢口而西。登赤壁磯。觀孫曹戰處。慷慨悲歌。俯仰今古。北眺烏林。傷雄心之乍岨。東

望夏口。羨瑜亮之逢時。遐想徘徊。不知逸氣之橫發也。繼過岳陽。觀洞庭。長濤巨浸。驚魂耀魄。諸方溟滓。一瞬皆空。則有細宇宙。齊物我。吞吐萬象。并羅八極之心。及登衡嶽。覽洞壑之幽邃。與林泉之隈隩。慮澹物輕。心怡神曠。又若棲真委蛇。歷遐蹈景之事。不難爲也。嗟乎。人之心。何其易變。而屢遷耶。太虛無形。茫晏漠泯。瀕濛鴻洞云爾。日月之迭照。煙雲之變態。風雨露雷之舒慘。淑氣游氛之清濁。日交代乎前。而太虛則何所厭慕乎。卽太虛亦不自知其爲虛也。夫心之本體。豈異於是耶。今吾所歷諸境。不移於舊。而吾之感且愕。且愛且取者。顧何足控搏。乃知向所云者。盡屬幻妄。是心不能化萬境。萬境反化心也。夫過而留之。與逐而移焉。其謬等耳。殆必有不隨物爲欣戚。混漠感以融觀者。而吾何足以知之。

襄陽府科第題名記

汪大夫守襄陽之三年。諸大令旣舉。乃惟章表人物。以興士勵俗。取明興以來。郡中科第之士。總百口十人。出諸屬邑者。咸附焉。勒石學宮。虛其左方。以俟來者。而余適以使事道漢上。爲記其事。夫自我國家以科目選士。士生此時。卽行若由魚。才懷管蕭。非是亦無繇以進。顧一切皆限以科條。槩矧雖絕材奔駟。亦必類首屈就羈勒。而足力稍後者。又輒有頓躓之虞。故襄陽爲楚中鉅郡。然二百年來。而闔郡之士。登名科第者。才百口十人而已。可不謂希覯而闕聞者哉。然余聞之古之戕國者。恆視其有人無人。以爲彊弱。夫謂國有人者。非肩摩轂擊。朝市皆盈也。而無人者。又非宮府左右。盡皆虛也。得士與不得士而已。夫得則以一二。人重於千百。不則以千百人輕於一二。故馬不必擁軸。要之齊足。木不必蔽乘。要之中墨。夫士惡可以多寡言哉。國初之取士。或拔於臺隸。或舉於三老。或奮於刀筆。當時號爲制科者。率不過百餘人。

其作爲文詞。皆據經義。不務剽剝葩藻。乃近時人所共姍笑者。而名卿碩士。往往多出其中。功烈施於後世者。至不可縷數也。今文教大興。海內嚮學。於是悉罷諸薦士路。一切網以科第。士爭趨闕下。若魚鱗雜還。雲合霧集。文學彬彬。可謂極盛。然考其功實。顧相懸也。異日者。天子患吏治之不振。增頒制額。廣羅英雋。令窮鄉鰥邑。皆用科第士。以爲長吏。其欲興平致理。蓋惓惓焉。乃求之愈多。而呈材愈乏。若是者何。擷華之悅目。固不若摘實之充口。故士之適用。誠不可以多寡論也。余嘗往來襄漢間。美其風俗。與縉紳大夫處。咸質直厚重。辯於心而訥於口。及聞長老言。前輩風烈。尤爲恂實爾雅。大者以經術取卿大夫。輔翊其世主。功名著於春秋。小者下至郡邑守令。咸可稱述。颯颯乎。固大國之風也。如此。卽百□十人。庸可以少稱乎哉。夫人材之汙隆。由於風俗。乃風俗亦賴人材以成。亢桑抱道。畏壘大穰。綿駒善謳。齊右變俗。故君子之處世。所以制俗者也。非由俗制者也。將使浮者挽之。以就實。而況實焉者乎。漓者釀之以還醇。而況醇焉者乎。語曰。不習爲吏。視已成事。後有興者。考德論世。審名實之所歸。察操執之所究。斯亦得失之林已。若曰。整齊其故事而已。非大夫意也。

學農園記

樊遲請學稼。而孔子小之。意遲欲躬稼勤苦。思以易天下。如許行所稱皇農之道。並耕而治者。故孔子明禮義。信大人之學。以廣其意。如曰。能如是。民歸之。且有爲之稼者。何用屑屑自親其事爲。夫聖賢之言。各有攸當。世儒見遲鄙嗤於孔子。便謂農不足學。綺衣燦爛。鐘鼓饌玉。剝下自潤。而不睹其艱。第令此曹得侍孔子。詎足以小人嗤之邪。昔晉簡文不識稻。閉閣三日不出。猶有慚色。曰。寧有賴其末而忘其本者。夫

天子之尊。猶以不知穡事爲恥。況其下者。何敢自逸。余少苦篤貧。家靡擔石。弱冠登仕。裁有田數十畝。嘉靖甲寅。以病謝。自念身被沈痾。不能簪筆執簡。奉承明之闕。若復馳逐城府。與賓客過從。是重增其戾。乃一切謝屏親故。卽田中闢地數畝。植竹種樹。誅茆結廬。以偃息其中。時復周行阡陌間。前田父傭叟。測土壤燥濕。較種稂先後。占雲望祲。以知歲時之豐凶。每觀其被風露炙煇日。終歲僕僕。僅免於饑。歲小不登。卽婦子不相眄。而官吏催科。急於救燎。寡嫠夜泣。逋寇宵行。未嘗不惻然以悲。惕然以恐也。或幸年穀順成。黃雲被隴。歲時伏臘。野老驢呼。相與爲一日之澤。則又欣然以喜。囂然以娛。雖無冀缺躬餽之勤。沮溺耦耕之苦。而咏歌欣戚。罔不在是。旣復自惟。用拙才劣。乏宏濟之量。惟力田疾耕。時得甘臚。以養父母。庶獲無咎。且斯事雖賤。非學亦無繇知也。因榜其園曰學農。以申止足之義焉。或曰。農生民之本也。周家用稼穡興王業。卽治天下國家。固亦繇力本節用。抑浮重穀。而後化可興也。吾子意在斯乎。夫君子志其遠者大者。小人志其淺者近者。吾儕小人。饔飧之不給。是虞而又敢有他志。且爲菟裘以娛吾生而已。詩曰。優哉游哉。聊以卒歲。

荊州府題名記

荊州舊無題名。定山袁公。由祠部郎中。出守茲郡。三年。旣政成民熙。公府多暇。按郡志。訪遺老。得國初以來太守若干人。同知通判推官。總若干人。紀其遷授年月。并勒於石。以傳永永。其中或用賢能。取卿相顯名當世。鴻猷遺惠。至今誦之不衰。或但有姓名。考其樹立。莫可稱述。後之覽者。必將有感焉。斯亦得失之林已。居正旣得覽觀。前守行實。因以慨風俗之盛衰。乃喟然稱曰。嗟乎。夫弛張之道。豈不由世變哉。余聞

里中父老。往往言成化宏治間。其吏治民俗。流風蔑如也。是時明有天下幾百年。道化汪濊。風氣純古。上下俱欲休息乎無爲。而荊州爲楚中巨郡。戶口蕃殖。獄訟希簡。民各安其鄉里。親愛長吏。長吏出行。旌麾前導。社中兒羣遊嬉車側。不知走匿。蓋其風純至如此。太守以下。率八九歲一易。卽無他異能。而因常襲故。亦稱賢能。當其時。治之爲易。其繼也。醇俗漸漓。網亦少密矣。變而爲宗藩繁盛。骫權撓正。法貸於隱蔽。再變而田賦不均。貧民失業。民苦於兼并。又變而僑戶雜居。狡僞權詭。俗壞於偷靡。故其時。治之爲難。非夫沈毅明斷。一切以摘姦剔弊。故無由勝其任而愉快矣。然則地豈有難易哉。流俗漸靡。使然耳。語曰。聖人不能違時。振敝易變。與時弛張。亦各務在宜民而已。居今之時。用曩之治。欲因常襲故。以希治平。譬以鄉飲酒之禮理軍市也。亦必不可幾矣。是風俗之變也。嗟乎。明興纔百九十年。而變已如是。吾安知繼今以往。其將變而厭棄今俗。以復古之敦龐簡易乎。抑將變而愈甚。以至於莫知其所終乎。後之治者。非隨俗救弊。又將安所施乎。是皆不可知也。姑記此以俟來者。

宜都縣重修儒學記

庚戌之春。余用侍從。請告歸故郡。宜都教諭魏大濟。來移書曰。宜都舊有學也。歲久寢敝。薦紳先生。學士大夫。遊其中者。咸思以新之。而未能。嘉靖乙巳。會稽陶侯。來守茲土。大濟則間以是謀之。侯慨然曰。是在余矣。會天大雨。江水溢。巨木浮江而下。取以爲材。省費之什二。乃爲堂爲廡爲祠。又置學田五百餘畝。以繕祭器。給師生之廩祿。自他舊制。有不當於人者。侯皆一新之。於是百年之廢。一朝具興。厥功茂焉。乃大濟與諸生。則願以其事紀之於石。以垂不朽。史張氏乃言曰。余聞之。孔子道之以政。齊之以刑。民免而無

恥傳曰。如欲化民成俗。其必由學乎。信哉。是言也。夫法令政刑。世之所恃以爲治者也。言道德禮義。則見以爲希闊而難用。然要其本。則禮禁未然之前。法施已然之後。法之爲用易見。而禮之爲教難知。故古之王者立大學以教於國。設庠序以化於邑。皆所以整齊人道。敦禮義而風元元者也。今議者不深惟其本始。驚爲一切之制。以愉快於一時。夫教化不行。禮義不立。至於禮樂不興。刑罰不中。民將無所措其手足。當此之時。雖有嚴令繁刑。祇益亂耳。烏能掄斯敗乎。由此觀之道民之術。在彼不在此也。宜都環數里以爲邑。處僻遠之區。吏復不能加意以振起士習。數十年。學者益落。然陶侯一新學。而人皆訴訴薦紳先生。學士大夫咸相與踴躍讚嘆。改觀而思奮。延及齊民。亦無不被服於德教者。此其轉移化道之機。蓋有不言而風行者矣。故上之化下。猶影響也。何必政刑。子之武城。聞絃歌之聲而喜之。豈爲一絃歌足以治武城哉。在以道化民。漸漬以禮樂。而孔子取焉。故曰。君子學道則愛人也。若陶侯所謂君子者。非耶。雖然。人知陶侯之功矣。猶未悉其深意。自孔子沒。微言中絕。學者溺於見聞。支離糟粕。人持異見。各信其說。天下於是修身正心。真切篤實之學廢。而訓詁詞章之習興。有宋諸儒力詆其弊。然議論乃日以滋甚。雖號大儒宿學。至于白首。猶不殫其業。而獨行之士。往往反爲世所姍笑。嗚呼。學不本諸心。而假諸外。以自益。祇見其愈勞愈敝也矣。故宮室之敝。必改而新之。而後可觀也。學術之敝。必改而新之。而後可久也。陶侯不憚改作。以新宜都之學。宜都之士。亦必不憚去其舊習。以自新其學。繼自今儻有闕聖人之宮牆。而升堂入室者。詎知非吾言啓之與。

荆門州者故荊州府北鄙也。今上龍飛漢郢。陸安陸州爲府。割旁郡屬邑以益之。乃荆門又改隸承天焉。古稱東南形勢。荆襄爲吳楚上游。襄陽北距宛洛。荊州西控巴蜀。而荆門介居荆襄間。唐鄧瞰其腹脅。隨郢益其肘臂。南望江陵。勢若建瓴。重關複壁。利以阻守。運奇制勝。亦足以衝敵人之肘脇。故稱荆門言隘地也。詳其名義。度其要害。迺知改隸之議。漏於是矣。天下幸而無事。關門夜啓。行者不道。傲守者不執戈。雖有險。無所用之。卽一旦狗吠於垣。烽煙乍警。則步仞之邱。阻於崢嶸。尋常之流。畫爲天塹矣。況此州當南北要衝。爲荊郡門戶。噫。其可忽哉。余聞長老言。始荊門隸荊州時。人物殷富。蓄積盈囷。食山澤之利。民至老死。不睹市廛。今密邇潛邸。供需百出。又當九達之達。冠蓋往來。項背相望。少不如意。卽被遣斥。長吏奔走。救過不給。而其民亦頗飾詐。狡獪。驚爲一切。苟免。無周身之慮。蓋舊俗之亡久矣。夫財不足則爭。信不足則僞。爭與僞。大姦之所資也。何以守險。曰。人何以聚。人曰。財。財贍而禮義生。卽有大姦盜。莫之敢乘。昔者孔子之論政曰。足食足兵。而民信之。非甚不得已。不敢去一。故善爲天下慮者。毋使至於不得已也。夫欲先事。弭患。息民固土。唯在拊循愛養哉。唯在拊循愛養哉。按南宋時。荆門爲邊郡。自象山陸先生守是州。倡明道學。以易其舊俗。又積貯築城。爲守禦之備。荆門遂爲重鎮。然先生收之於瘡痍凋瘵之後。而今也。養之於國家全盛之日。程時度力。難易又殊矣。余嘗讀先生錄。至所謂分別義利之辨者。乃使人斤斤焉。神竦心惕。及過荆門。謁先生祠下。又低回久之。不能去。詩曰。高山仰止。景行行止。苟有志於斯民者。伐柯之則。夫豈遠哉。荆門舊無題名。州守戴君。同知鄒君。始創爲之。戴君精敏而孚惠。鄒君慎清而端慤。皆能其官。故余志之。亦以告後人。

重築松滋縣城記

嘉靖乙卯松滋尹張君家傳抵任二年釐正百務積滯具舉乃爲文抵當路曰邑故有土城歲久且圯里甲約斂民財歲歲補葺而姦民陰規其利乾沒自潤實無益於秋毫城圯如故今獨不可規久遠一切用磚石俾姦民無所規其利而邑以永寧且夫不一勞者不久逸不暫費者不終省竊與邑中士大夫老熟計之皆以爲修之便於是分守大參鶴峰柳公分巡憲副槐溪孫公郡守定山袁公咸報曰如令議適歲大稔遂用其年八月始事君乃捐俸酌贖庀公約費民爭趨之至十月工竣爲城八百丈甃以巨石局以崇關井幹樓櫓靡不宏麗屹屹爲巨觀矣異日撫治檄列郡督所屬州邑城垣宜修者所司竟持空文塞責莫敢爲先乃張君以實奉行不憚一時之勞而建百世之利民不告瘁大工克就厥功茂焉史張氏曰余讀周詩至免置之章曰赳赳武夫公侯干城嘗嘆以爲文武之初治化旁洽膠結民心雖免置之野人皆可以爲干城扞禦何其盛也其季也疆圉多故在位者多曠諸大夫憂之曰無俾城壞無獨斯畏勞役不已曰土國城漕吁又何瘁也豈所謂盛世之守在人季世之守恃險耶在人者無形之險也恃險者有形之險也然亦時異世變有不得不然者明興百八十餘年屬國家隆運寓內無鷄鳴狗盜之警民至老死不見兵革可謂極盛矣往時東南瀕海之區列縣數十富甲天下無城守局鎬之限及海寇竊發長驅諸郡民皆駢肩束手莫之敢撓何則事變起于倉卒而人心狃于治安此必斃之道也夫無形之險旣已靡恃而有形之險復不加修則是束手駢肩俟斃已矣松滋西接夔峽而江阻山卽有緩急亦要區也人之恆情能見已然不能見將然時屬清泰未睹其利害一旦有不測則是城所繫豈直一手一足之爲

烈哉詩曰。訐謫定命。遠猷辰告。茲役有焉。庸紀其事。以垂不朽。張君名家傳浙之鄞縣人。果毅有爲其在邑治理諸務。皆如城事。相其畫者。縣丞蘇曜。主簿韓隆。董其工者。省察官田輜。並列於後。以彰保障之功。

王承奉傳

王承奉大用者。霸州人也。逮事敬皇帝。爲奉御。侍慈壽皇太后於仁壽宮。毅皇帝時。陞御馬監太監。賜蟒衣。內苑乘馬。通顯矣。然性刻廉剛直。弗能下其儔輩。以是不得久內庭。出爲遼府承奉。是時遼莊王病。不能視事。委政國妃毛氏。國妃賢通書史。沈毅有斷。而承奉從內佐之。所釐正國家事。不可勝道。頃之。莊王與國妃相繼薨。嗣王立。王聰敏辯給。而嗜利刻害。及長。多不法。常出數百里外遊戲。有司莫敢止。故無所憚。然心獨憚承奉。承奉好直諫。王積弗能忍。乃曰。承奉老矣。宜免朝請。於是承奉希得見王。王少無子。所幸樂婦生子。置外舍。久之。王有萎病。度終無子。乃取外舍兒內宮中。時兒已八歲。詐曰。宮人某氏子。欲以聞於朝。故事。王子生。承奉司卽具所生母姓名。及產媼狀。關相長史。乃得奏附玉牒。王以其事下承奉。承奉愕曰。王安得有子。承奉乃不識何宮人有娠。及產子狀。不敢奉令。王大怒曰。老奴敢爾者死邪。於是盡捕承奉諸用事者。皆榜笞數百。被重罪。欲以迫脅承奉。承奉終不爲動。王乃召承奉。繆爲好語曰。而不知予之爲病耶。事成而有後主。而富貴可長保。獨奈何爲他人忠。承奉伏地叩頭流涕曰。老奴受國厚恩。死無以報。顧此事涉欺罔。法例嚴甚。王子非眞子。外悉知之。後有發者。禍且不測。老奴死。不敢奉令。王謬謝曰。承奉言是也。乃以計給奪其印。而自署承奉名行之。承奉既見欺。無可奈何。懟以首撞壁。大叫曰。生不幸。爲刑餘。又棄外藩。今王所爲如是。吾弗能匡救。禍且及矣。誠不忍老見刑獄。卽閉戶自經。繩欲絕。會有